

<https://www.thelatinlibrary.com/plautus/captivi.shtml>

ille demum antiquis est adulescens moribus, 105
cuius numquam voltum tranquillavi gratiis.
condigne pater est eius moratus moribus.
nunc ad eum pergam. sed aperitur ostium,
unde saturitate saepe ego exii ebrius.

I.ii

HEGIO Advorte animum sis tu: istos captivos duos, 110
heri quos emi de praeda a quaestoribus,
eis indito catenas singulares
istas, maiores, quibus sunt iuncti, demito;
sinito ambulare, si foris si intus volent,
sed uti adserventur magna diligentia. 115

liber captivos avis ferae consimilis est:
semel fugiendi si data est occasio,
satis est, numquam postilla possis prendere.

LORARIVS Omnes profecto liberi lubentius
sumus quam servimus. **HEG.** Non videre ita tu quidem. 120

LOR. Si non est quod dem, mene vis dem ipse—in pedes?

HEG. Si dederis, erit extemplo mihi quod dem tibi.

LOR. Avis me ferae consimilem faciam, ut praedicas.

HEG. Ita ut dicis: nam si faxis, te in caveam dabo.
sed satis verborumst. cura quae iussi atque abi. 125